



ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ԳՆՈՒՄՆԵՐԻ ԲՈՂՈՔԱՐԿՄԱՆ ԽՈՐՀՈՒՐԴ

ք. Երևան

03.08.2017թ.

Ո Ր Ո Շ ՈՒ Մ

ՀՀ գնումների բողոքարկման խորհրդի

թիվ ՍՑ-ԷՍ-2017/12

ՀՀ գնումների բողոքարկման խորհուրդը (այսուհետ նաև՝ Խորհուրդ) ուսումնասիրելով ՀՀ ֆինանսների նախարարության 15.06.2017թ. թիվ 03/27-1/10821-17 գրությամբ «Ավելմեդ» ՍՊԸ-ին գնումների գործընթացին մասնակցելու իրավունք չունեցող մասնակիցների ցուցակում ներառելու նպատակով նախաձեռնված պաշտոնական ընթացակարգով ներկայացված հիմքերը, պարզեց հետևյալը.

1. ՀՀ ֆինանսների նախարարության ներկայացրած փաստերը և պահանջը.

ՀՀ ֆինանսների նախարարությունը, «Տուբերկուլոզի դեմ պայքարի ազգային կենտրոն» ՊՈԱԿ-ի 13/06/2017թ. թիվ 348 գրության հիման վրա, 15.06.2017թ. թիվ 03/27-1/10821-17 գրությամբ Խորհրդում նախաձեռնել է «Ավելմեդ» ՍՊԸ-ին գնումների գործընթացին մասնակցելու իրավունք չունեցող մասնակիցների ցուցակում (այսուհետ՝ նաև Ցուցակ) ներառելու պաշտոնական ընթացակարգ:

ՀՀ ֆինանսների նախարարությունը պատշաճ ծանուցվել է Խորհրդում անցկացվող նիստերի ժամանակացույցի վերաբերյալ, սակայն նախարարության կողմից լիազորված որևէ ներկայացուցիչ չի ներկայացել:

2. «Տուբերկուլոզի դեմ պայքարի ազգային կենտրոն» ՊՈԱԿ-ի կողմից ներկայացրած փաստերը և դիրքորոշումը.

«Տուբերկուլոզի դեմ պայքարի ազգային կենտրոն» ՊՈԱԿ-ը 13.06.2017թ. թիվ 348 գրությամբ դիմել է ՀՀ ֆինանսների նախարարությանը՝ հայտնելով հետևյալը.

«ՀՀ ԱՆ «Տուբերկուլոզի դեմ պայքարի ազգային կենտրոն» ՊՈԱԿ-ի կարիքների համար բժշկական սարքավորումների, գործիքների և պարագաների ձեռքբերման ՇՀԱՊՁԲ-15/16-ՏԴՊԱԿ-24 ծածկագրով 2017 թվականի մայիսի 3-ին կայացած շրջանակային համաձայնագրերով ընթացակարգին «Ավէմեդ» ՍՊԸ-ի ներկայացրած հայտը 2017 թվականի հունիսի 9-ի գնահատող հանձնաժողովի վերագնահատման նիստի թիվ 9 որոշմամբ 2-րդ չափաբաժնով գնահատվել է անբավարար և մերժվել է տեխնիկական բնութագիրը չհամապատասխանելու հիմնավորմամբ:»:

Խորհրդում նախաձեռնված պաշտոնական ընթացակարգի քննության նպատակով տեղի ունեցած նիստերին մասնակցում էր «Տուբերկուլոզի դեմ պայքարի ազգային կենտրոն» ՊՈԱԿ-ի ներկայացուցիչ՝ Արթուր Աբգարյանը:

3. «Ավէմեդ» ՍՊԸ-ի ներկայացրած փաստարկները և դիրքորոշումը.

Խորհուրդը դիմել է «Ավէմեդ» ՍՊԸ-ին՝ հնարավորություն տալով ՀՀ ֆինանսների նախարարության կողմից 15.06.2017թ. թիվ 03/27-1/10821-17 գրությամբ Խորհրդում նախաձեռնված պաշտոնական ընթացակարգի վերաբերյալ ներկայացնել Ընկերության դիրքորոշումը, սակայն վերջինիս կողմից որևէ դիրքորոշում չի ներկայացվել:

Խորհրդում նախաձեռնված պաշտոնական ընթացակարգի քննության նպատակով տեղի ունեցած նիստերին մասնակցում էր Ընկերության տնօրեն՝ Վլադիմիր Անտաշյանը:

4. ՍՑ-ԷՍ-2017/12 պաշտոնական ընթացակարգի քննության համար էական նշանակություն ունեցող փաստերը, Խորհրդի հիմնավորումները և եզրահանգումը.

Խորհուրդը ուսումնասիրել է ՀՀ ֆինանսների նախարարության 15.06.2017թ. թիվ 03/27-1/10821-17 գրությունը, «Տուբերկուլոզի դեմ պայքարի ազգային կենտրոն» ՊՈԱԿ-ի (այսուհետ նաև՝ Պատվիրատու) 13/06/2017թ. թիվ 348 գրությունը, «ՇՀԱՊՁԲ-15/16-ՏԴՊԱԿ-24» ծածկագրով շրջանակային համաձայնագրերի միջոցով գնում կատարելու ընթացակարգի գնահատող հանձնաժողովի (այսուհետ նաև՝ Հանձնաժողով) 03.05.2017թ. N 2, 18.05.2017թ. N 5, 01.06.2017թ. N 6, 05.06.2017թ. N 7, 06.06.2017թ. N 8, 09.06.2017թ. N 9 կայացած նիստերի արձանագրությունները, «ՇՀԱՊՁԲ-15/16-ՏԴՊԱԿ-24» ծածկագրով շրջանակային համաձայնագրերի միջոցով գնում կատարելու ընթացակարգի հրավերը (այսուհետ՝ Հրավեր)

և ՀՀ գնումների բողոքարկման խորհրդի 03.07.2017թ. կայացրած թիվ ԳԲԽ-ԷՍ-2017/16 որոշումը.

«Տուբերկուլոզի դեմ պայքարի ազգային կենտրոն» ՊՈԱԿ-ը բժշկական սարքավորումների, գործիքների և պարագաների ձեռքբերման նպատակով հայտարարել է ՇՀԱՊԶԲ-15/16-ՏԴՊԱԿ-24 ծածկագրով շրջանակային համաձայնագրերի միջոցով գնում կատարելու ընթացակարգ:

«ԱՎԷՄԵԴ» ՍՊԸ-ն կազմակերպված ընթացակարգի 2-րդ չափաբաժնին մասնակցելու նպատակով ներկայացրել է հայտ:

Հանձնաժողովը 18.05.2017թ. N 5 արձանագրությամբ «ԱՎԷՄԵԴ» ՍՊԸ-ին Ընթացակարգի երկրորդ չափաբաժնի մասով ճանաչել է ընտրված մասնակից և 26.05.2017թ. Ընկերությանն է ներկայացրել պայմանագիր կնքելու առաջարկն ու պայմանագրի նախագիծը, սակայն 01.06.2017թ. N 6 արձանագրությամբ Հանձնաժողովը Ընկերությանը գրկել է պայմանագիրն ստորագրելու իրավունքից՝ հրավերով նախատեսված ժամկետում ստորագրված պայմանագիրը չներկայացնելու հիմնավորմամբ:

Այնուհետև, Հանձնաժողովը 05.06.2017թ. ժամը 14:00-ին կայացած նիստի N 7 արձանագրությամբ որոշում է կայացրել 18.05.2017թ. N 5-րդ արձանագրության 1.2 և 1.3 կետերով «ԱՎԷՄԵԴ» ՍՊԸ-ն ընտրված մասնակից ճանաչելու որոշումը, պայմանագիր կնքելու առաջարկը և 01.06.2017թ. N 6 արձանագրությունը համարել անվավեր և հրավիրել վերագնահատման նիստ, քանի որ «ԱՎԷՄԵԴ» ՍՊԸ-ի Ընթացակարգի 2-րդ չափաբաժնով ներկայացրած տեխնիկական բնութագրերը գնահատելիս եղել են տեխնիկական բացթողումներ:

06.06.2017թ. ժամը 10:30-ին կայացած N 8 արձանագրության 1.1 կետով Հանձնաժողովը արձանագրել է հետևյալը.

««ԱՎԷՄԵԴ» ՍՊԸ-ի ներկայացրած տեխնիկական բնութագրում տեղ գտած անհամապատասխանությունները հետևյալն են.

Տեխնիկական բնութագրում բացակայում են հրավերով պահանջվող վիրտուալ լուսավորման ապահովումը, անոթների հունի պատկերավորման ռեժիմը բարձր տարածական /ժամանակային հնարավորությամբ, մազանոթների հունի պատկերավորման ռեժիմի հնարավորության բարձր տարածական/ժամանակային լուծմամբ և կադրերի բարձր հաճախականությամբ, PRF հյուսվածքային դոպլերի համար 2100–13500 Հց կադր/վրկ հաճախականությունը հյուսվածքային դոպլեր ռեժիմում ոչ պակաս քան 1000, սկանավորման խորություն ոչ պակաս քան 40 սմ, PRF անընդհատ-ալիքային դոպլերի

համար ոչ պակաս քան 1400-49700 Հց, պատկերի մեծացում՝ մասշտաբի իրական ժամանակում ոչ պակաս քան 25 անգամ, «սառեցված» պատկերի մեծացում ոչ պակաս քան 25 անգամ: Հրավերով նախատեսված է կոնվերսային տվիչի հաճախականությունների դիապազոն առնվազն 1.2-6.0 ՄՀց, իսկ ներկայացրածի դիապազոնը 2.5-5.3 ՄՀց է, պահանջվող գծային տվիչի հաճախականությունների դիապազոնը առնվազն 5.5-14.0 ՄՀց, իսկ ներկայացրածի դիապազոնը 4-12.8 ՄՀց է:»:

Նույն արձանագրության 2-րդ կետով Հանձնաժողովը որոշում է կայացրել ծանուցել «ԱՎԷՄԵԴ» ՍՊԸ-ին մեկ աշխատանքային օրվա ընթացքում շտկելու նշված անհամապատասխանությունները, սակայն Ընկերության կողմից նշված ժամկետում արձանագրված անհամապատասխանությունները չեն շտկվել:

Հանձնաժողովը 09.06.2017թ. կայացած նիստի N 9 արձանագրությամբ որոշում է կայացրել Ընկերության հայտը տեխնիկական բնութագրի մասով գնահատել անբավարար և մերժել:

«ԱՎԷՄԵԴ» ՍՊԸ-ն 14.06.2017թ. ՀՀ գնումների բողոքարկման խորհրդին ներկայացրել է բողոք:

Խորհրդի կողմից ներկայացված բողոքը ընդունվել է վարույթ, որին տրվել է ԳԲԽ-ԷՍ-2017/16 ծածկագիրը:

Նշված բողոքով «ԱՎԷՄԵԴ» ՍՊԸ-ն պահանջել է չեղյալ հայտարարել «ՇՀԱՊՁԲ-15/16-SԴՊԱԿ-24» ծածկագրով շրջանակային համաձայնագրերի միջոցով գնում կատարելու ընթացակարգի գնահատող հանձնաժողովի՝ 01.06.2017թ. N 6 արձանագրությամբ կայացրած «ԱՎԷՄԵԴ» ՍՊԸ-ին ընթացակարգի N 2 չափաբաժնով պայմանագիրը ստորագրելու իրավունքից զրկելու վերաբերյալ և 06.06.2017թ. N 7 արձանագրությամբ «ԱՎԷՄԵԴ» ՍՊԸ-ին ընթացակարգի N 2 չափաբաժնով ընտրված մասնակից ճանաչելու փաստն անվավեր համարելու մասին որոշումները, և «ԱՎԷՄԵԴ» ՍՊԸ-ին ճանաչել հաղթող մասնակից՝ վերը նշված չափաբաժնի մասով:

Ընկերությունը ընթացակարգին մասնակցելու նպատակով ներկայացրած հայտի N 4.1 հավելվածով՝ առաջարկվող ապրանքների՝ հրավերով նախատեսված տեխնիկական բնութագրերին համապատասխանության մասին հայտարարությամբ, հայտարարել և հավաստել է, որ «ՇՀԱՊՁԲ-15/16-SԴՊԱԿ-24» ծածկագրով շրջանակային համաձայնագրերի միջոցով գնում կատարելու ընթացակարգի շրջանակներում իր կողմից ներկայացված հայտով առաջարկվող չափաբաժնում նշված ապրանքի տեխնիկական բնութագիրը համապատասխանում է ընթացակարգի հրավերով նախատեսված ապրանքի տեխնիկական

բնութագրերին և 1-ին տեղն զբաղեցրած մասնակից ճանաչվելու դեպքում պարտավորվում է ներկայացնել իր կողմից հաստատված՝ հայտով առաջարկված ապրանքի անվանումը և տեխնիկական բնութագիրը:

ԳԲԽ-ԷՍ-2017/16 բողոքի քննության նպատակով հրավիրված նիստի ժամանակ «ԱՎԷՄԵԴ» ՍՊԸ-ի տնօրենը ընդունել է այն փաստը, որ Ընկերության կողմից Ընթացակարգին մասնակցելու նպատակով ներկայացված հայտով առաջարկված գնման ենթակա ապրանքի տեխնիկական բնութագրում առկա են Պատվիրատուի կողմից ներկայացված անհամապատասխանությունները:

Խորհուրդն արձանագրել է, որ Ընկերության կողմից Ընթացակարգին մասնակցելու նպատակով ներկայացված հայտով առաջարկված գնման ենթակա ապրանքի տեխնիկական բնութագրում առկա են անհամապատասխանություններ և չեն համապատասխանում Ընթացակարգի հրավերով պահանջվող տեխնիկական բնութագրի պահանջներին:

Խորհուրդը հաշվի առնելով վերոգրյալը՝ գտել է, որ Պատվիրատուն՝ մերժելով «ԱՎԷՄԵԴ» ՍՊԸ-ի Ընթացակարգի 2-րդ չափաբաժնով մասնակցելու նպատակով ներկայացրած հայտը, գործել է իրավաչափ և մերժել է «ԱՎԷՄԵԴ» ՍՊԸ-ի կողմից 14.06.2017թ. ՀՀ գնումների բողոքարկման խորհրդին ներկայացված բողոքը:

«Գնումների մասին» ՀՀ օրենքի (այսուհետ նաև՝ Օրենք) 5-րդ հոդվածի 1-ին մասի 4-րդ կետի բ. ենթակետի համաձայն՝ մասնակիցն ընդգրկվում է գնումների գործընթացին մասնակցելու իրավունք չունեցող մասնակիցների ցուցակում, եթե հայտը ներկայացնելու պահին նախորդող տարվա ընթացքում գնման գործընթացի շրջանակում ներկայացրել է կեղծ տվյալ:

Օրենքի 31-րդ հոդվածի 1-ին մասի համաձայն՝ հայտերը գնահատվում են հրավերով սահմանված կարգով: Բավարար են գնահատվում հրավերով նախատեսված պայմաններին համապատասխանող հայտերը, հակառակ դեպքում հայտերը գնահատվում են անբավարար և մերժվում են:

Խորհուրդն գտնում է, որ Ընկերությունը ընթացակարգին մասնակցելու նպատակով ներկայացրած հայտի N 4.1 հավելվածով՝ առաջարկվող ապրանքների՝ հրավերով նախատեսված տեխնիկական բնութագրերին համապատասխանության մասին հայտարարությամբ, հայտարարելով և հավաստելով, որ «ՇՀԱՊՁԲ-15/16-ՏԴՊԱԿ-24» ծածկագրով շրջանակային համաձայնագրերի միջոցով գնում կատարելու ընթացակարգի շրջանակներում իր կողմից ներկայացված հայտով առաջարկվող չափաբաժնում նշված

ապրանքի տեխնիկական բնութագիրը համապատասխանում է ընթացակարգի հրավերով նախատեսված ապրանքի տեխնիկական բնութագրերին և 1-ին տեղն զբաղեցրած մասնակից ճանաչվելու դեպքում պարտավորվելով ներկայացնել իր կողմից հաստատված՝ հայտով առաջարկված ապրանքի անվանումը և տեխնիկական բնութագիրը՝ ներկայացրել է կեղծ տվյալ:

Խորհուրդն արձանագրում է, որ «ԱՎԷՄԵԴ» ՍՊԸ-ին գնումների գործընթացին մասնակցելու իրավունք չունեցող մասնակիցների ցուցակում ներառելու նպատակով ՀՀ ֆինանսների նախարարության կողմից Խորհրդում նախաձեռնված պաշտոնական ընթացակարգով առկա չէ որևէ տեղեկատվություն կամ ապացույց այն մասին, որ Ընկերությունը հայտը ներկայացնելու նախորդող տարվա ընթացքում թույլ է տվել Օրենքի 5-րդ հոդվածի 1-ին մասի 4-րդ կետով սահմանված որևիցե խախտում:

Հաշվի առնելով վերոգրյալը՝ Խորհուրդը գտնում է, որ «ԱՎԷՄԵԴ» ՍՊԸ-ին գնումների գործընթացին մասնակցելու իրավունք չունեցող մասնակիցների ցուցակում ներառելու հիմքեր առկա չեն:

Ելնելով վերոգրյալից և ղեկավարվելով «Գնումների մասին» ՀՀ օրենքի 5-րդ հոդվածի 2-րդ մասով, 48-րդ հոդվածի 6-րդ մասի 7-րդ կետով՝ ՀՀ գնումների բողոքարկման խորհուրդը


Ո Ր Ո Շ Ե Ց

ՀՀ ֆինանսների նախարարության կողմից 15.06.2017թ. թիվ 03/27-1/10821-17 գրությամբ «ԱՎԷՄԵԴ» ՍՊԸ-ին գնումների գործընթացին մասնակցելու իրավունք չունեցող մասնակիցների ցուցակում ներառելու նպատակով նախաձեռնված պաշտոնական ընթացակարգը մերժել:

ՀՀ գնումների բողոքարկման խորհրդի որոշումն իրավապարտադիր է:

ՀՀ գնումների բողոքարկման խորհրդի որոշումը կարող է բողոքարկվել դատական կարգով:

**ՀՀ գնումների բողոքարկման
խորհրդի անդամ՝**



ԷՄԻԼ ՍԱՐԳՍՅԱՆ